

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINA BANOVIĆI
OPĆINSKO VIJEĆE**

Broj:10/01-02-100/17

Datum:28.02.2017.godine

Na osnovu člana 40. Zakona o obrtu i srodnim djelatnostima ("Sl. novine F BiH" broj: 35/09 i 42/11), člana 24. Zakona o unutrašnjoj trgovini ("Sl. novine F BiH broj: 4/10), člana 11. Zakona o ugostiteljskoj djelatnosti ("Sl. novine FBiH", broj 32/09), člana 14. Zakona o ugostiteljskoj djelatnosti ("Sl. novine TK-a broj: 1/12 i 14/16), člana 35. do 43. Zakona o radu ("Sl. novine FBiH" broj:26/16), čl. 20. Zakona o zaštiti od buke("Sl. novine F BiH br. 110/12), člana 8. Zakona o principima lokalne samouprave ("Sl. novine F BiH" broj: 49/06) i člana 25. Statuta Općine Banovići ("Sl. glasnik općine Banovići" broj: 03/08) i člana 91. Poslovnika o radu Općinskog vijeća, Općinsko vijeće općine Banovići na (4.) četvrtoj redovnoj sjednici održanoj dana **28.02.2017.** godine donosi:

O D L U K U
o radnom vremenu djelatnosti na području općine Banovići

OPĆE ODREDBE

Član 1.

Odlukom o radnom vremenu u djelatnostima na području općine Banovići (dalje: Odluka) utvrđuje se radno vrijeme u toku sedmice, te početak i završetak radnog vremena u toku dana u objektima koji se nalaze na području općine Banovići u kojima fizička i pravna lica, u skladu sa zakonom, obavljaju uslužne djelatnosti trgovine, ugostiteljstva, turizma, zanatstva (dalje: uslužne djelatnosti).

Član 2.

Odredbe ove Odluke ne primjenjuju se na:

- poslovne jedinice – radnje koje pružaju ugostiteljske usluge uposlenim u preduzećima, organizacijama, udruženjima i ustanovama;
- na stovarišta u kojima se vrši promet robe na veliko;
- na prodajna mjesta u sklopu pijaca.

Član 3.

Minimalno radno vrijeme je vrijeme u kojem objektu u kojima se obavljaju uslužne djelatnosti moraju biti otvoreni radi zadovoljavanja potreba građana.

Minimalno radno vrijeme traje najmanje 7 sati dnevno, s tim da ne može biti kraće od četiri (4) sata prije podne i tri (3) sata poslije podne, osim ako ovom Odlukom, za pojedine uslužne djelatnosti nije drukčije određeno.

Izuzetno, u dane vikenda, državnih i vjerskih praznika, može se utvrditi i kraće radno vrijeme.

Radna sedmica ne može biti kraća od 6 radnih dana, osim ako ovom Odlukom nije drukčije određeno.

Član 4.

Obavijest o radnom vremenu mora biti istaknuta na vidnom mjestu na ulazu u radne prostorije, a lica koja obavljaju uslužne djelatnosti dužna su da se pridržavaju istaknutog radnog vremena, utvrđenog u skladu sa ovom Odlukom.

Član 5.

Radno vrijeme u poslovnim prostorima može biti i duže od minimalnog radnog vremena utvrđenog ovom Odlukom i to na način kako utvrde subjekti poslovnih prostora, uz prethodno pribavljeno odobrenje nadležne općinske službe (dalje: Služba).

RADNO VRIJEME U OBLASTI USLUŽNIH DJELATNOSTI RADNO VRIJEME TRGOVAČKIH DJELATNOSTI

Član 6.

U prodavnicama u kojima se vrši promet na malo prehrambenim proizvodima mora se obezbijediti radno vrijeme svakim radnim danom od 06⁰⁰ do 20⁰⁰ sati, a u zimskom računanju vremena u periodu od 07⁰⁰ do 18⁰⁰ sati, s tim da najduže radno vrijeme može biti do 21⁰⁰ sata u zimskom računanju vremena, a u ljetnom računanju vremena do 21³⁰ sata. Izuzetno od odredbe prethodnog stava u prodavnicama koje ne mogu obezbijediti neprekidno radno vrijeme, mogu raditi dvokratno, a u skladu sa članom 3. stav 2. ove Odluke.

Član 7.

Prodavnice tipa dragstor moraju biti otvorene neprekidno od 00 do 24⁰⁰ sata.

Član 8.

U prodavnicama u kojima se vrši promet na malo neprehrambenim proizvodima može se obezbijediti radno vrijeme svakim radnim danom od 07⁰⁰ do 17⁰⁰ sati, a subotom od 07⁰⁰ do 15⁰⁰ sati. Izuzetno od odredbe prethodnog stava u prodavnicama koje ne mogu obezbijediti neprekidno radno vrijeme, mogu raditi dvokratno, a u skladu sa članom 3. stav 2. ove odluke.

Član 9.

U dane državnih praznika radno vrijeme objekata iz člana 6. i 8. je kako slijedi:

- ako državni praznik traje jedan dan taj dan se ne radi;
- ako državni praznik traje dva dana prvi se dan ne radi, a drugog dana radno vrijeme je kao i nedjeljom za objekte koji inače rade nedjeljom tj. od 7⁰⁰ do 12⁰⁰ sati.

Član 10.

Minimalno radno vrijeme u apotekama je 7 sati dnevno, subotom 5 sati, a nedjeljom 5 sati, s tim što se rad može odvijati i dvokratno u skladu sa čl. 3. st. 2. ove odluke. Apoteke mogu raditi i duže od minimalnog radnog vremena, kada je organizovano dežurstvo u trajanju od 00-24 sata radnim danima, u noćnim časovima, subotom i nedjeljom u vrijeme praznika, ukoliko ispunjavaju zakonom predviđene uvjete.

Član 11.

Radno vrijeme benzinskih pumpi, te ugostiteljskih i trgovinskih objekata koji rade u sastavu benzinskih pumpi može trajati u vremenu od 00 do 24⁰⁰ sata.

RADNO VRIJEME UGOSTITELJSKIH DJELATNOSTI

Član 12.

U objektima u kojima se obavlja ugostiteljska djelatnost određuje se završetak radnog vremena najkasnije do 23⁰⁰ sata u zimskom računanju vremena, odnosno 24⁰⁰ sata u ljetnom računanju vremena, izuzev petka i subote kada može trajati do 24⁰⁰ sata u zimskom računanju vremena. Muzika u ovim objektima mora prestati 1 sat prije prestanka radnog vremena. Nakon isteka radnog vremena zabranjeno je zadržavanje lica u objektu osim uposlenika tog objekta.

Član 13.

Hoteli, moteli, pansioni, prenoćišta i drugi objekata koji pružaju usluge smještaja i to odjel recepcije, mogu svoje radno vrijeme organizovati non stop tj. od 00 do 24⁰⁰ sata.

Član 14.

Svi ugostiteljski objekti moraju ispunjavati posebne uslove iz Zakona o zaštiti od buke.

Član 15.

Ugostiteljski objekti mogu produžiti radno vrijeme iznad maksimalno utvrđenog radnog vremena za jedan sat, bez korištenja muzike, podnošenjem zahtjeva za produžetak radnog vremena ugostiteljskog objekta u trajanju do tri mjeseca (uz mogućnost obnove zahtjeva) uz uslov:

- da ispunjavaju uslove posebne uslove propisane članom 14. ove Odluke,
- ako protiv ugostitelja (vlasnika) za navedeni ugostiteljski objekat nije u zadnja tri mjeseca od dana predaje zahtjeva bilo podnošenja prijava za remećenja javnog reda i mira kao i zbog nepoštivanja odredbi ove Odluke (uvjerenje Policijske uprave Živinice - Policijska stanica Banoviću i Općinskog suda Banovići.

Član 16.

Vlasniku ugostiteljskog objekta i Privrednom društvu kojima je rješenjem nadležne Službe dozvoljeno produženje radnog vremena, a isti se ne pridržavaju odredbi ove Odluke uskratit će se dalje produženje istog na period ne kraći od šest mjeseci.

Zahtjev za ukidanje produženja radnog vremena može podnijeti nadležna inspekcija, vijeće mjesne zajednice, grupa građana (stanara) i Policijska stanica Banovići.

Član 17.

Ugostiteljski objekti u kojima se organizuju svečanosti i zabave (rudarske zabave, maturske zabave, svadbe, proslave godišnjica, vjerskih praznika, manifestacije, novogodišnjih praznika, proslava 8. Marta, koncerti i druge slične zabave) mogu raditi u radnom vremenu od 19⁰⁰ sati do 03⁰⁰ sati narednog dana, ukoliko su prethodno pribavili rješenje o produžetku radnog vremena od nadležne Službe.

Član 18.

Ugostiteljski objekti izuzev hotela i motela koji pružaju usluge smještaja mogu uvesti jedan dan kao neradni u sedmici.

Član 19.

Objekti u kojima se obavljaju djelatnosti koje se odnose na igre na sreću u skladu sa Zakonom o igrama na sreću F BiH, kao i djelatnosti koje se odnose na pružanje internet usluga, a u kojima se ne služe alkoholna pića i ne pušta muzika, mogu svoje radno vrijeme organizovati najkasnije do 23⁰⁰ sata, ukoliko ispunjavaju uvjete predviđene zakonima koji reguliraju ove oblasti.

RADNO VRIJEME ZANATSKIH DJELATNOSTI

Član 20.

Objekti u kojima se obavljaju zanatske djelatnosti moraju obezbijediti minimalno radno vrijeme u skladu sa članom 3. ove Odluke, osim pekara koje mogu raditi 24 sata.

Član 21.

Privredno društvo, odnosno vlasnik ugostiteljskog i drugog objekta kome je ograničeno produžetak radnog vremena može pokrenuti postupak za ukidanje ograničenja radnog vremena i to tek nakon proteka roka od najmanje 6 mjeseci po pravosnažnosti rješenja o ograničenju radnog vremena.

KAZNENE ODREDBE

Član 22.

Novčanom kaznom u iznosu od 500,00 do 1.000,00 KM kazniće se za prekršaj pravno lice i vlasnik djelatnosti – fizičko lice od 300,00 KM :

- ako odredi radno vrijeme suprotno odredbama ove Odluke;
- ako na ulazu u objekat vidno ne istakne obavijest o radnom vremenu (član 4. Odluke);
- ako se ne pridržava radnog vremena;
- ako dozvoljava boravak gostiju nakon isteka radnog vremena;
- ako koristi muziku suprotno članu 12. ove Odluke

Za prekršaje iz prethodnog stava kaznit će se i odgovorno lice u pravnom licu novčanom kaznom od 200,00 KM do 500,00 KM.

PRIJELAZNE I ZAVRŠNE ODREDBE

Član 23.

Općinsko vijeće ovlašćuje Općinskog načelnika da može za djelatnosti iz člana 1. ove Odluke odrediti drugačije radno vrijeme u dane praznika od radnog vremena propisanog Odlukom, ako ocijeni da za to postoji potreba.

Član 24.

Nadzor nad sprovođenjem odredaba ove Odluke vršit će nadležne inspekcije i nadležna Policijska uprava - Policijska stanica.

Član 25.

Subjekti koji obavljaju djelatnosti iz člana 1. ove Odluke dužni su svoje radno vrijeme uskladiti sa odredbama ove Odluke u roku od 30 dana od dana njenog stupanja na snagu.

Član 26.

Stupanjem na snagu ove Odluke prestaje da važi Odluka o radnom vremenu uslužnih djelatnosti na području općine Banovići broj:16-02-451/02 od 27.12.2002.godine, Zaključak broj: 16-02-450/02 od 27.12.2002. godine i Odluka o izmjenama i dopunama Odluke o radnom vremenu uslužnih djelatnosti na području općine Banovići broj:12/01-02-229/06 od 01.09.2006. godine.

Član 27.

Ova Odluka stupa na snagu danom objavljivanja u „Službenom glasniku općine Banovići“.

OBRAZLOŽENJE:

Razlog za donošenje nove Odluke o radnom vremenu u određenim djelatnostima ogleda se u sledećem:

- ❖ Važeća Odluka koja je usvojena 27.02.2002. godine i izmjena i dopuna Odluke koja je donešena 01.09. 2006. godine nije u određenim odredbama pratila niti usklađivana sa Zakonima koji tretiraju navedenu oblast, a prije svega sa:
 - Zakonom o obrtu i srodnim djelatnostima ("Sl. novine F BiH" broj: 35/09 i 42/11),
 - Zakona o unutrašnjoj trgovini ("Sl. novine F BiH broj: 40/10),
 - Zakona o ugostiteljskoj djelatnosti ("Sl. novine FBiH", broj 32/09),
 - Zakona o ugostiteljskoj djelatnosti ("Sl. novine TK-a broj: 1/12 i 14/16),
 - Zakona o zaštiti od buke ("Sl. novine FBiH br. 110/12).
- ❖ Pomenutom Odlukom takođe nije tretirano radno vrijeme pojedinih uslužnih djelatnosti, a što je definisano novom Odlukom.
- ❖ Zbog učestale pojave puštanja muzike posle isteka radnog vremena ukazala se potreba za smanjenjem mogućnosti produženja radnog vremena na 1 sat.
- ❖ Uvedene su nove i strožije kaznene odredbe za prekršioce odredaba ove Odluke.

PREDSJEDAVALAČI OPĆINSKOG VIJEĆA

Delagić Nermin